

# LANG ER 10. NOVEMBER 2018 SAMS TAG

Communicaziun a las medias dals 29 d'october 2018

## 12 uras cultura a la 12avla Sonda lunga

Il 10 da november ha lieu per la 12avla giada la Sonda lunga sin las tribunas ed en ils locals d'exposiziun da Cuira. Da mezdi fin mesanotg porschan 20 chasas passa 80 differents puncts da program en pli che 200 preschentaziuns. Per in program rumantsch procuran quest onn la Lia Rumantscha, il teater Klibühni, Cuira Turissem, la Postremise e Weekly Jazz cun RTR Radiotelevisiun Svizra Rumantscha. Las occurrenzas en detagl chatt'ins sin [www.langersamstag.ch](http://www.langersamstag.ch).

Il concept da la Sonda lunga è sa cumprovà: 12 uras cultura a Cuira. Il 10 da november porschan 20 instituziuns da tuttas sorts prelecziuns, teaters, concerts, saut, performances, guidas e lavuratori. Per mintga gust e mintga vegliadetgna datti insatge. Era contribuziuns rumantschas u bilinguas na mancan betg. Anzi, la cultura rumantscha survegn quest onn ina plattafurma speziala a la Sonda lunga.

## Contribuziuns rumantschas multifaras

La Lia Rumantscha ch'è quest onn da la partida sco giast avra sias portas a la Via da la Plessur. En l'Oasa d'istorgias pon las visitadras ed ils visitaders sfunsar en il mund da cudeschs e sa scuntrar cun il pastur Giacumbert Nau, cun Uorsin e sia plumpa u cun il giat Brutus che ha adina nauscha luna. Il suentermezdi raquinta Tim Krohn ensemen cun Corina Rinaldi da ses inscunters cun la mattetta Bigna en la Val Müstair – discours da chaussas pitschnas ch'èn mintgatant pulit grondas. E tgi na giavischass betg d'esser adina fortunà? Il scienzà sar Cunter vul inventar ina maschina da fortuna. Sche quai gartegia mussa il teater per uffants cun Annina Sedláček e Nikolas Stocker. La saira tutga la tribuna a Pascal Gamboni. Ina giada solo ed ina giada accompagnà da la cellista Isabella Fink celebrescha el la forza da la simpladad.

Dal bainstar culinaric s'occupan Corina e Guido Sgier dal hotel Postigliun ad Andiast. I dat pulenta e fratem, chapuns cun e senza charn e bler auter pli.

Er il teater Klibühni metta il focus sin la cultura rumantscha. Il suentermezdi represchenta Justina Derungs «Celestina - la cremera», in teater per pitschen e grond en rumantsch e tudestg. Celestina n'è betg ina cromra usitada. Ella porta ina gronda chascha plain truclets sin il dies ed è adina en viadi, chanta, sauta e... regala istorgias. La saira fan Flurina Badel, Georg Scharegg e Lorenzo Polin ina prelecziun scenica dal roman «La Müdada» da Cla Biert. Ina producziun cumedianta e profunda a medem temp

La Postremise metta il chant da chors en il center. En il rom dal punct da program «Chorlandschaft Grischun – Suns e tuns da 150 vals» sa preschentan il chor Uvriu Danis/Tavanasa sut la batgetta da Daniel Pally e l'ensemble vocal Incantanti dirigì da Christian Klucker.

Il partenari da medias RTR emetta a chaschun dal giubileum da 10 onns Weekly Jazz live da la bar dal Marsoel. Tranter auter cun las musicistas Sidonia Caviezel e Nina Mayer che preschentan exclusiv il 46avel Top Pop Rumantsch.

Sco preparaziun per ils puncts da program en rumantsch porscha Cuira Turissem las guidas «Per giassas e streglias – laufend Romanisch lernen». Durant in gir curt tras la citad veglia da Cuira pon ins s'avischinar a la quarta lingua naziunala ed emprender in pèr plets rumantschs.

Bigliets per la Sonda lunga pon ins cumprar tar Cuira Turissem en la staziun sco era durant la Sonda lunga a las cassas da las instituziuns participantas. Ulteriuras infurmaziuns ed il program da la Sonda lunga chatt'ins sin [www.langersamstag.ch](http://www.langersamstag.ch).

**La comunicaziun a las medias ed il material illustrativ chattais Vus en il champ Medien sut [www.langersamstag.ch](http://www.langersamstag.ch).**

#### **Contact**

Verein Langer Samstag  
c/o PURPUR Kultur & Management GmbH  
Anita Willi  
Kornplatz 12, CH-7000 Cuira

+41 (0)81 250 60 81  
[anita.willi@pur-pur.ch](mailto:anita.willi@pur-pur.ch)